

# SAN PEDRO KARTA E'SU FXI'JNI

## Dxus yakh fxi'zesatx Pedro fxi'jni

**1** <sup>1</sup>Jesukristo's selpisáa Simon Pedro yaaseth, txajx jxkaahnisa. Txáasa naa karta's fxi'jaçthu, i'kwe'sxwa kwe'sx na'wëyçxáa i'kwe Dxusa's yaakxwa'ja's ji'phu naa pa'ga. Txá'wë yuukahní kwe'sxtxi nwe'wesa Jesukristo nwe'wek. <sup>2</sup>Dxusa's jiyui'kwe sa' kwe'sxtxi jxpe'jsa Jesusa'swa jiyupa'ga, wala ew mfxi'zewe.

## Dxus ma'wésate' txáa na'wëysa yuuna pa'jya' na'wésatx mpaakwewe

<sup>3</sup>Txáa pa'gatey kwe'sxtxi pa'yasa's jiyupa'ga txá' jxuka úsku kwe'sx kíh peejini'swa, sa' kíh pkal yuhwa ji'phméé fxi'zewa'ja'swa txá'wëy. <sup>4</sup>Txá'wë Dxusa' kíhte yuhwa sxiigmée pu'çxwa'ja's ji'phçxa íçxáak kwe'sxtxi's nwe'weya' puutx we'we. Txá'wë yúute', i'kwe'sxa' naa kiwete jxuka ewmeesa kazx yajkxna fxi'zenijü txuteeçxa, txáa ma'wésate' txáa na'wëysa íçxáa yuuna pa'khanku txá'wë yúu. <sup>5</sup>Txáa pa'ga Dxusa' pu'çxhina sühwa'ja's ji'phçxa', jweeíçxáa ew fxi'zewa'ja's mji'phuwe. Sa' ew fxi'zewa'ja's ji'phuçxa', Dxusa's jweeíçxáa ew jiyuwa'ja's mpaakwewe. <sup>6</sup>Dxusa's ew jiyuwa'ja's ji'phuçxa', peekx kakwe ewméé yúuya' yaakxni's nwéese'jmée fxi'zewa'ja's mji'phuwe. Peekx kakwe's nwéese'jmée fxi'zewa'ja's ji'phuçxa', nxuswa'j pa'thewa çxhâçxha fxi'zewa'ja's mpaakwewe. Sa' txá'wésana ji'phuçxa', Dxusa'sçxáa neewe'wena fxi'zewa'ja's mpaakwewe. <sup>7</sup>Dxusa'sçxáa neewe'wena fxi'zewa'ja's ji'phuçxa', yakhthê'jwe'sx yakh ewçxáa wët fxi'zewa'ja's mpaakwewe. Txá'wésa's ji'phuçxa', peeygáawa'ja's mji'phuwe.

<sup>8</sup>Txá'wésatx i'kwe'sxa' jxpa'gaçxa jxuka nwéese'jçxa', kwe'sxtxi jxpe'jsa Jesukristo's kxulteeçxáa jiyuçxa en ivxiit-sa yuumeene'kwe. <sup>9</sup>Nawa maawa txá'wésatx ji'phmeesa' uyya' ájasamée na'wésa yuuna, sa' Dxusa' pkaltxi's peltunâyetewa peçxkanasa yuuna. <sup>10</sup>Txáa pa'ga Dxusa' i'kwe'sxtxi txhitxhçxa pa'yayá'the', txá'wésatx i'kwe'sx úuste bagaçxtewa ji'phuwa'jçxá's mpa'pçxuwe. Txá'wë yúuçxa' bagaçxte yuhwa

Dxus tasxu txutemeene!kwe. <sup>11</sup>Txã'wě yūusatxi! thēymée ūsni yuuna Jesukristo kwe'sxtxi nwe!wesa tasxte u!kawa!ja's. Kxteea! bagaçxte yuhwa pçuwa!jsame!.

<sup>12</sup>I!kwe'sxa! txã'wě yūuwa!ja's ew jiiçxa ãçxh naa ensu isa pta'sxnijū txutemée ūsne!kwe, nawa adxa! txã'wě yūuwa!ja's kaayaki!jna nes yu'nja. <sup>13</sup>Adx uumeçxáawa i!kwe'sxtxi! yu!kxpehna nes yuuni ewna sūju!th peçxkanawe'sxte. <sup>14</sup>Txã'wěme!, txaçxmeyna adx uuwa!ja's kaajiyu!kh kwe'sxtxi jxpe!jsa Jesukristo!. <sup>15</sup>Txãa pa'ga nee uumeçxáawa yu!kxpehna nes yu'nja, kxah adx uutewa i!kwe'sx ūuste neeyūute!, peçxkanamée kxtey yuuna nes yuune!kwe.

### Jesukristo txakwe seena! walasa's uysáa

<sup>16</sup>Kwe'sxtxi jxpe!jsa Jesukristo kīhtewa jxuka ājasa sxawedna kīiwa!ja's pta'sxtha!w txã! ūus yajkxçxa īsxiinisameek yu!. Txãa pa'gatey kwe'sx yafxju yuu uytha!w txakwe seena! zhiçxkwe walasa yuuçxa vxyaate. <sup>17</sup>Txã'wě Dxus kwe'sx Tata! Jesukristo's weçxana zhiçxkwe eena! kweethni'stha!w uy, sa! Dxusa! na!wěk we!we: Na! adx Nçxi!k wedxnisa!, txãa pa'ga wala weçxana ūsthu jī!k. <sup>18</sup>Cielujū txã!jīna we!weni's kwe'sx yuutha!w wěse!j, thā!j vxiçte Dxus vxyaak kxte kwe'sxtxi jxpe!jsa Jesukristo yakh ūsçxa!.

<sup>19</sup>Txã'wěçxáamée, vxite ji!ptha!w txãak wejx āate pta'sxi!. Txã! e!su Dxus ma!wě yūuwa!ja'swa dxiikhēy pta'sxna fxi!jçxa nvxiitnisa!. Txãa pta'sxnisa's i!kwe'sxa! nwēese!jçxa!, ew yūusáa yuune!kwe. Txãa!i kus çxhi!dxtewa eena! kweethsa!, khikhiçte estrelxa na!wěsa i!kwe'sx ūuste pki!tapkaçx. <sup>20</sup>Nawa i!kwe'sxa! ew mjiyuwe: Dxus yuwe dxiikhēy pta'sxna fxi!jçxa nvxiitnisa! maa yuhwa peekx ūusuhçxáa yajkxçxa fxi!jnisa yuumeeta!. <sup>21</sup>Txãa pa'gatey Dxus kīh yūuya!watewa dxiikhēy pta'sxsawe'sxa! Dxus yakh fxi!zesatx yu!, sa! peekx ūusuhçxáa yajkxçxa we!wemée, Dxus Espiritu kwe!we!thetx txã'wě fxi!jna ūsu!.

### Dxus yuwe's īsxiina pta'sxsa

**2** <sup>1</sup>Txã'wětewa, īsxiisawa ūsu!tx Dxus yuwe pta'sxsatha!w jīsa Israelwe'sx ksxavxysu, sa! i!kwe'sx ksxavxysuwa txã'wěy īsxiisa kasejetxna. Txãawe'sxa! kaypuba!jwa!jçxá's yajkxçxa i!kwe'sx jiyunimeete kaapiya!jatxna. Txã'wě yūuna nwe!wesa Kristo's yuu açesa yuutxna. Nawa txã'wě yūusa! peekiçxáa wala dud vxituwa!j ji!phutxna. <sup>2</sup>Txã'wě yūute!, maazkuēesawa txãawe'sx ewmeesa's kaapiya!jniçxá's kxtey yuuna fxi!zetxna, aç! txãawe'sx pa!gaçxáa Dxus yuwe isasa yu! açewe!weni yuuna. <sup>3</sup>Txãawe'sxa! i!kwe'sxtxi vxuu wala kutxi!j wēeçxa kīhçxáawa īsxiina kaapiya!jatxna. Nawa txãawe'sx vxituwa!j en pa!jana. Txãa ente! iyumeetxna. Txã'wě ewmeete pa!jwa!theçxáa yā!j nvxiitni ūsta! nyafxīi.

<sup>4</sup>Dxusa! txajx angeleswe'sx yuhtxwa peltunaime! ewmée yūusa yā!txhi's. Txãasa!iik infxierno iiméh seena! wala çxhi!dxe nvxihtna ūsu!

kastigäywa'lj en ähtewe'sx. <sup>5</sup>Dxusa' nyafxíi enteywa peltunaïme' nasa ewmeesawe'sxtxi'. Txäasaíik nasa ewmeesawe'sxtxi ivxiituya' nus kaahna ũsu'. Naasáa Dxus yuwe pta'sxsa Noé yuuçxáanak nwe'we vxite' txajx yattewe'sx sietesa yã'ljçxa. <sup>6</sup>Txã'wëy Dxusa' Sodomá vxite' Gomoçxa çxhaptxi kastigäyçxa jxuka khuuççxáa yuupkaçxku ivxiitu. Txã'wë yūunisa yu' maawa nasa ewmeesa yuutxi' txã'wëçxaçxáa kastigai'nja jina pta'sxnísak yu'. <sup>7</sup>Nawa Lot yu'sa' nwe'wek, txãa piçthê'ja' Dxus dxi'pte wala ew fxi'zesa yu'k, txãasak iiméh wala ewmée fxi'zesatx uyçxa', wala nxusna fxi'ze'. <sup>8</sup>Txãa piçthê'j ew fxi'zesa' seena' ewmeesawe'sx yakh ũsçxa', txãawe'sx ewmée we'weni's wëse'jna ewmée yūuna fxi'zeni'swa uyçxa een isak txajx ũuste wala nxusna fxi'ze'. <sup>9</sup>Txã'wëk Kristo' nwe'we', txãa yakh utxaaçxa txutemée fxi'zesa nxuste fxi'zesatxi's, sa' ewmée yūuna fxi'zesatxi's kastigäywa'lj vxitçxak nvxiitu' kastigäywa'lj en ähtewe'sx.

<sup>10</sup>Sa' Dxusa' txã'wëçxaçxáa kastigaina ewmée yaakxniçxá's nwëese'ljçxa kazx yūuna fxi'zesatxi's. Txã'wë yūukahníi txãawe'sxa' Kristo jxkaahni's weeçxna nwëese'jmée juuna'çxáa yūusaata', sa' ũukhmeetx wëesxu' ma'wësatxwa jxuka. <sup>11</sup>Naapkaçxha' angeleswe'sxa' txãa wëesxusaate jxthaakwe çxhãçxha juuna'sata' naa yuhwa txãa wëesxusaatxi's wëesxuna Dxus dxi'pte ewmeete nvxiitu'çmeeta'.

<sup>12</sup>Txã'wëtewa txãa nasa' tajkx na'wësaçxáata' ew eena' yaakxwa'lj yu'sa' ji'phmeeta', sa' ma'wësaawa uweçxa ikhkahn upxaçxáata'. Dxusa's açewe'wepa'ga tajkx na'wëçxáa uutxna. <sup>13</sup>Vxitetx pkxuupa'ga txãawe'sxwa pkxuuni uutxna. Weeçx weeçtxxi yaaki' naa kiwete pçuwa'ljsa yakhçxáa ũsçxawa. Sa' txãawe'sxa' i'kwe'sx yakh ũsçxa', i'kwe'sxtxi kaythame'jna yuwe susnatx fxi'ze' i'kwe'sx pkhaakhenite pa'ljçxa.

<sup>14</sup>Txãawe'sx ũuste ewmée yajkxmée yu' neeyü'çmeeta' u'y pu'jykhëwçxa'. Pkal yūuwa'lja's watxi'çmeeta'. Peekx kakwe's açxamée çxhãçxha pa'yakxsatxi's thëymeetx pkalte kweete'je'. Vxyua's iiméh wala ji'phu wëesaçxáata'. Txãawe'sxa' Dxus dxi'pte vxituwa'ljsata'. <sup>15</sup>Ewsa's nvxihtçxa jxpubana ũsta', Beor nçxi'k Balaan na'wëy yūusaçxáata'. Txãa Balaana' ewmée yūuççxak vxyu's wala ji'phu wëe. <sup>16</sup>Naa pa'ga txajx a'jni jiba' nasa na'wëk juuna' we'we txajx pkal yūu wëeni's. Txã'wë yūuççxak Balaan ewmée yaakxni's kaanvxiitu'lj.

<sup>17</sup>Txãa nasa' pusu yu' ji'phmeesa na'wësata', sa' täaphnawa ma'wëga wejxa jxūna u'ljwe' txã'wëysaçxáata'. Txãawe'sxa' infxierno iiméh seena' wala ũukhūukh çxhi'dxte ũswa'ljsata'. <sup>18</sup>Txãawe'sxa' selpiiwa'ljmeesaçxáana wala iivejçx we'we'tx, sa' txãawe'sx kakwe pkal yūu wëeniçxá's nwëese'jni yakh vxitetx pkalte kweete'je'tx, jxpubana fxi'zenijū kasehçxa ũssatxwa. <sup>19</sup>Txãawe'sxa' kīh yuhnawa nwëese'jmée fxi'zewa'lja' jī'tx, nawa txãawe'sxíi yuuwa kxtey yuumée

ewmée pkal yu'sa' pejka yuhtx nwēese'jna fxi'ze'. Txāa pa'gatey nasa maawa kīja's wejx yaakina na' txā'sna nwēese'jna selpisaaçxa txā'wē yuuna. <sup>20</sup>Txā'wē nwe'wesa Jesukristo's jiyuçxa naa kiwete ewmée yūuna fxi'zenijū kasehsaçxawa, ki' txāatxiçxāa nwēese'jya' sxaweduuna. Aça' txā'wē yūusa' nyafxii fxi'zenite jxthaakwe ewmeetek wetena pa'ja'. <sup>21</sup>Txāawe'sxa' isa kaapiya'jni's jiyumeewaçne! wejx ew yu', txā'wē Dxus jxkaahni's jiyuçxa ki' txuteena ūsya'mée. <sup>22</sup>Txā'wē yūusatx we'weçxak na'jī': Alku' pugaçxawa, ki' sxawedku txajx puganitey. Aça' kuçxi' ew atexçawa, txitx khūçxtek pēw jī'k.

### Kristo sxawedna kīiwa'lj en

**3** <sup>1</sup>Yakhthē'jwe'sx, naa karta' e'su fxi'jnisa yā'ja'. Nawa e'z kartatey i'kwe'stxxi yu'kxpehna fxi'jaçthu, ew jxpa'yakx ūskahn. <sup>2</sup>Na'wē Dxus yuwe pta'sxsawe'sx nyafxiiitey we'wetx nasa ewmeesa pa'jwa'ja's, naapkaçxha' Jesus jxkaahnisawe'sxa' Jesukristo jxkaahni's i'kwe'stxxi kaapiya'jtx txāatx peçxkanamée ūskahn yu'kxpeçxthu.

<sup>3</sup>Na'wē yūuwa'ja's khuē'y mpa'yajkxwe. Nmeh en yuuçte', nasa kasejetxna txāawe'sx kakwe pkal yūu wēeniçxá's nwēese'jçxa Dxus jīi yu'sa' açesa. <sup>4</sup>Sa' na'jīna weeçxna paapēyitxna: Kristo' sxawedu'nja jīçxa, çmteega yuu? Sa' naa kiwewaçwa kīh yuhwa yu'pthehnimée ūsa', nyafxii ma'wēne' pheu'jni yuu txā'wēesa ūsa' açxpkaçx jīttxna. <sup>5</sup>Txāawe'sxa' yaaki'çmeeta' na'wē yu'pthehni yuuk txā'sa'. Nyafxii entey Dxus jxkaahnite pheu'jni yuutx cielu, kiwe, vxite' yu'. Aça' e'su yu'pthehçxa yu'a's fxiik nvxiht kiwenawa txā'wēy. <sup>6</sup>Sa' vxite ente' Dxusa' we'wena jxkaahçxa' nusa'sku kaah, aça' kiwe txāa entewe'sxa' vxituk yu'te. Txā'snatx jiyumeeçxa yu'pthehnime' jī'. <sup>7</sup>Sa' açxh neeyūsáa ūsta' cielu vxite' kiwe txāatxi' Dxusiik we'weçxa nvxiht nasa ewmeesatx jxuka naa kiwete ivxiituwa'lj ente ipx naa kiwe's jxuka kabuna jīna.

<sup>8</sup>Yakhthē'jwe'sx, vxite na'wēsa'swa mjiyuwe: Kristo yakha' teeçx ensaçxáa ma'k yuu meeçxa' mil anxusa ma'k yuu nawa txaçxsa yu' meea', txāa na'wēçxaçxáata'. <sup>9</sup>Txāa pa'gatx maafia' naa sūju': Kristo' sxawedu'nja jīçxawa iiméh wala txaçx jxthēyuuça' jīnatx we'we'. Nawa Kristo' txā'wē jxthēyuuçme'. Txā' teeçxçxáa yuhwa vxitumée ewmée yūuna fxi'zenijū dud sxawedwaça' sūhna ūyhasnaçxáa ūsa'.

<sup>10</sup>Txāasa Kristo kīiwa'lj ena' āhçxáa yuuna yajkxmée ūsiyna, pesweewa ma'wēga kus yaakxnimeete pa'ja' txā'wēy. Naapkaçxha' cielu' jxuka suweetxna seena' susniite, aça' kījkīhwa jxuka ipxte çxhavxyna pçuutxna. Kiwewa txā'wēy çxhavxiina kxtee kīhçxah ūstxna txāa jxuka.

<sup>11</sup>Txā'wē seena' jxuka pçuwa'jsa' txāa pa'ga i'kwe'sxa' iiméh wala ew fxi'zewal'j jī'phi'kwe, Dxus yakh utxaaçxa bagaçxte yuhwa txutemée. <sup>12</sup>I'kwe'sxa' Dxus kīiwa'lj ena's wala pa'pçxuna mūyhaswe. Txā'wēme' txāa ente' cielu' jxuka vxitutxna ipxte, naapkaçxha' kījkīhwa jxuka

yu'watxna ipx açxate. <sup>13</sup>Naapkaçxha' kwe'sxa' cielu u'sesa kiwewa u'sesa'stha'w üythasu', Dxusa' txã'wësa's üsya' neeyüuk txã'sna. Kxteea' kîhwa jxuka ewsaçxáa üs yuuna.

<sup>14</sup>Txãa pa'ga txã'wë yüuwa'ja's üythasna üsçxa', wala jxpa'yakx meswe, kxah i'kwe'sxa' Dxus dxi'pte yuuwemeesa ew fxi'zesa yuune'kwe txãa ente'. <sup>15</sup>Peçxkananuwe na'wë kwe'sxtxi jxpe'jsa Kristo jxthëeyuüça' nawa txãa yu' maawa ewte neeyüuwa'ja's pakwekahn txã'wë üythasna jxthëeyuüça'. Kwe'sx yakhthë'j Pablowa txã'wëyçxáak we'wena fxi'j Dxus kaaüusuthe'jni's. <sup>16</sup>Txajx fxi'jni karta jxuka naatxiçxáak we'wena fxi'j, nawa maaí yu' wala thëyta' jiyuwa'j, aça' açxamée Dxus yakh çxhãçxha fxi'zesa' jiyumeeçxatx txãa jiyunimeesatx txãawe'sx üuste fxiy yajkçxa yu'ptheje', txãasatx Dxus libru ma'snawa yu'ptheje', aça' txã'wë yu'pthehnisafiçxáa selpi'k txãawe'sx vxituwa'ja's.

<sup>17</sup>Txãa pa'ga, yakhthë'jwe'sx, wala mpa'yajkxwe dxiikhëy pta'sxni neeyüüçi'kwe txã'wësatx, txã'wë ewte yã'j fxi'zenijü txuteeçxa ewmeesa îsxiina kaapiya'jnite weteya'mée, <sup>18</sup>wejxwa jweefiçxáa kwe'sxtxi nwe'wesa Jesukristo's ew jiyuçxa peeygãawa'jçxáana ji'phuya' mpa'pçxuwe. Txã'sa' bagaçxtewa weçxana nes yuuwa'jsatha'w.